

Conoce bo matanan local “Maripampun”




Un di e problemanan cu nos tempo moderno y agita, ta cu masha poco hende sa savoria loke ta di nos, y mi no kier men un pastechi of un kroket. Si bo mira bon, cua mucha of mi por bisa adulto jong sa e diferencia entre Watapana y Kwihi, of Hubada hasta, laga para pa sa kico un Maripampun ta. Pesey di awe en dilanti mi ta bay cuminsa focus mas riba nos

matanan local.

Maripampun ta e fruta di e mata di Maripampun. E mata mes ta un behuco of manera hende macambisa lo bisa slingerplant cu ta lora rond di matanan o curanan di waya. E mata su nomber científico ta Matelea rubra y ta famia di e palo Catumbom y otro matanan favorito pa barbulet pone webó, desaroya y come

den y fei dje. Kisas bo a mira su troncon blanco parecido na corki ta lora rond di bo matanan of cura di waya y no a wak mas leu pa mira kico e ta. E tin simia parecido na e Catumbom cu ta bula cu biento. Pero antes, ora nos ta jong y ta cana den mondi, ta busca dadel di e cadushinan largo, shimarucu y otro fruta pa come, nos ta busca entre otro Maripampun pa come tambe.



Ora bo haye bo mester sa si e ta bon pa come. Si e stompi nan riba e fruta ta flexibel y no kier kita, nan ta bieu y no ta sirbi. Si nan ta kibra facil nan ta bon. Dje nos tabata busca un piedra grandi of un muraya y raspa nan contra dje, dje habri, saca e simianan y come cu salo. Si, tempo ey nos ta cana cu nos salo den un papel..warda den saco di carson. E tempo ey tabatin hopi cos di mira den mondi. Riba e matanan cu ta crece canti rooi bo ta mira neishi Gonzalito ta colga. Bo ta mira neishi di tur parha, incluyendo di blenchi berde y blenchi dorna sol. Si bo puntra mi si nos lo bolbe

mira e temponan ey atrobe? No, nan no lo bin, a menos no pa mayoria di nos mucha, pero si nos por haci nos hubentud mas consciente di naturalesa. Na Fantastic Gardens e fin di 2013, cu nos 30 aña di existencia nos lo habri nos hardin botanico oficialmente y scolnan por bin probecha pa siña nan muchanan un poco di nos matanan local, cual hopi dificil por wordo mira. E proyecto ey mi a cuminsa tres aña pasa. Wor e matanan cu un poco di ayudo a crece bira algo cu nos por mira, aprecia y siña di dje. Si bo no tin un pida mondi cerca di cas, probecha di bay Parke Arikok.